

## **Dithero tsa Tirelano mo Kutlwanong**

***40/2013 Thero ka Sontaga wa 10 morago ga moletlo wa Borarobongwe, e le ka 04. 08. 2013***

**MO LEINENG LA MODIMO O E LENG RARA LE MORWA LE MOWA O O BOITSHEPO!**

1. Sefela sa 269 - 251/260

**2. Thapelo:** Modimo o o Boitshepo, o re abele Mowa o o Boitshepo wa gago gore o re bitse ka Lefoko la gago. O re senolele maleo ka Lefoko la gago gore re a bone, re a hutsafalele. O re fe Mowa wa gago ka Lefoko la gago gore re bone Morepholosi yo o neng a sikara maleo a lefatshe. O re utlwele botlhoko, Rara. Re rapela mo leineng la ga Jesu Keresete yo e leng Mopholosi wa rona. Amen.

3. Epistolo ka fa thulaganyong ya 2 e kwadilwe mo go Baroma 11:25-32;

Efangele ka fa thulaganyong ya 1 e kwadilwe mo go Luka 19:41-48.

4. A go ipolelwe tumelo ya bokeresete!

5. Sefela sa 9 - 9/9

6. Thapelo ya mmadi wa thero.

**7. Lefoko la thero** ka fa thulaganyong ya 5 le kwadilwe mo go Jeremia 7:1-15, le re: "Lefoko le le tsileng kwa go Jeremia le tswa mo MORENENG la re: 'Ema mo kgorong ya Ntlo ya MORENA, o rere teng lefoko le o re: Utlwang Lefoko la MORENA, lona Bajuta lotlhe, ba lo tsenang ka dikgoro tse go obamela MORENA! MORENA wa masomosomo, Modimo wa Iseraele o bua jaana o a re: Siamisang ditsela tsa lona le ditiro tsa lona! Gona ke tla lo agisa mo felong fano. Lo se ka lwa ikanya mafoko a tsietso a a reng: 'Tempele ya MORENA, Tempele ya MORENA, Tempele ya MORENA ke yona e!' Mme fa lo ka siamisa ditsela tsa lona le ditiro tsa lona mo boammaaruring, lo a direlana ka tshiamo tota; lo sa gatelele moeng gongwe lesiela gongwe motlholagadi, lo sa tsholole madi a a se nang molato mo felong fano, lo sa latele medimo e sele - mo e leng go itshenyetsa fela! - foo ke tla lo agisa mo felong fano le mo lefatsheng le ke le neileng borraeno go tswa bogologolo le go ya bosakhutleng. Bonang, lo ikanya mafoko a tsietso a a sa thuseng sepe. Ga ke re, lo a utswa, lo a bolaya, lo senya nyalo, lo ikana ka maaka, lo fisesa Baale

maswalo, lo sala medimo e sele morago e lo sa e itseng! Lo fete lo tle lo eme fa pele ga sefatlhego sa me mo Ntlong e, e e bidiwang ka leina la me lo re: 'Re pholositswe!' A lo raya gore ga se sepe, le fa lo dira dilo tsotlhe tse di maila tseo? A Ntlo e, e e bidiwang ka leina la me, e fetogile logaga lwa dinokwane mo matlhong a lona? Ka nnete, le nna ke bonye jalo, go bua MORENA. Ee, tlogang lo ye kwa felong ga me, fa go neng go le kwa Silo, kwa ke neng ke agisa leina la me teng mo tshimologong, lo bone se ke se go diretseng ka ntlha ya bosula jwa Iseraele, morafe wa me! Mme jaanong, e re ka lo dirile ditiro tsotlhe tse - go bua MORENA - ka ke buile le lona, ka bua ka tlhoafalo, mme lo se ka lwa utlwa; ka lo bitsa, mme lo se ka lwa araba; ka moo ke tla direla Ntlo e e bidiwang ka leina la me, e lona lo e ikanyang, le felo fa ke go lo neileng le borraeno, ke tla go direla jaaka ke diretse Silo. Mme ke tla lo tlosa fa pele ga me, ke lo latlha, jaaka ke latlhile bomorwa-rraeno botlhe, e leng losika lotlhe lwa Eferaima.'" Amen.

**8. Thero:** Barategi mo Moreneng wa rona Jesu Keresete, moporofeti Jeremia o ne a na le tiro e e bokete thata, tiro ya go bolelela batho ka ga bogale jwa Modimo ka ntlha ya maleo a bone. Ga go na tsela gore re kgabise maleo fa pele ga Modimo. Ga re kgone go fitlha sepe fa pele ga ona. Ga re ka ke ra o tsietsa, ka go bua gore tse ke di dirang ke tsa ngwao ya ga etsho, ke ka fa ke di dirang ka teng ka fa setsong. Fa tiro e fapaana le molao wa Modimo ke bolelo, ke tshiamololo. Ga ke go itse gore fela ke Lejeremane, rona ba re leng Majeremane re dira tseo, ke ngwao ya rona, ke ka fa re tshelang ka teng. Ga re ka ke ra tla ka Sontaga ka go gopola gore Modimo ga o a ka wa re bona fa gare ga beke, ka o ntse fela mono mo kerekeng, mo ntlong ya ona, mo tempeleng ya ona.

Modimo o kutlwelobotlhoko, o bopelotelele, Modimo o rata go itshwarela batho ba ona, Morena ga a nke a galefela ruri. Mafoko a le mantsi mo Beibeleng a re bolelela ka ga bopelotlhomogi jwa Modimo mo go rona ba re leng baleofi. Mo Lefokong la thero ya kajeno re bona bogale jwa ona, kgakalo ya ona ka ntlha ya go tshameka ga batho ka bopelotlhomogi jwa ona, ka leina la ona, ka boitshwarelo jwa ona. Rona batho re itlhaganetse go tlwaela se se sa tshwanelang. Ka o le bopelotelele le rona, Modimo re ineela go o itlwaetsa mo go maswe. Ka Mantaga re a bolaya, ka Labobedi re a akafala, ka Laboraro re a utswa, Ka Labone re bua maaka ka ga mokaulengwe, ka Labotlhano re sotla bagolo ba rona, ka Motlhatswa re ikana ka maaka, ka Sontaga re apara sentle, re rapela, re kopa boitshwarelo ka maikaelelo a go tswelela fela ka Mantaga go bolaya, le go gatelela batlholagadi, le go ila, le tse dingwe tse di ntseng jalo. Go kopa boitshwarelo ka

go ikaelela gore re se fetole sepe mo botshelong jwa rona go tshwana le go bua maaka ka tsela e e maswe. Modimo ga o batle gore re tshameke ka maleo, ga o batle gore re tshameke ka boitshwarelo jo bo boitshepo jwa ona, re se ka ra tshameka ka boitshepo jwa ona.

Mo go rona baleofi go bokete go fetola botshelo jwa rona. Tota-tota maleo ga a fele re sa ntse re tshela. Kategisima e nnye e bua kwa go tlhalosiwang kolobetso teng, e re: "Go apola motho yo mogologolo, le go apara motho yo mošwa go teng ka metlha mo botshelong jwa modumedi, go ya a tloge mo lefatsheng leno, a tsene mo botshelong jo bo sa feleng ka tshiamo ya ga Keresete. Le fa motho a tswelela ka metlha mo botshelong jwa gagwe go apola motho yo mogologolo le go apara motho yo mošwa ga a goroge mo kemong gore a kgone go ipolela gore ke setse ke le mosiami ka diteko tsa me. Nyaya, re basiami ka ene Jesu fela. Gonne ke ene yo e leng tshiamo ya rona. Tirelo ya boipobolo e na le dipotso tse tharo. Ya ntlha e re: "A lo ipona molato, mme a lo a ipobola, fa lo le baleofi ba ba tlhomolang pelo, ba ba tlaletsweng, le ba ba se nang tshiamo le molemo le boitirelo?" Ya bobedi e re: "A lo a ikwathaya, a lo dumela mo leineng la ga Jesu Keresete, mme a lo eletsa boitshwarelo mo go ene, yo o swetseng dibe tsa lona?" Ya boraro e re: "A lo rata go siamisa botshelo jwa lona ka thata ya Mowa o o Boitshepo, go dira ka fa go rateng ga Modimo o o Boitshepo?" Molao wa Modimo o re senolela maleo a rona le bogale jwa Modimo ka ntlha ya maleo gore re tshabele mo go Jesu Keresete Mopholosi wa batho. Tirelo ya boipobolo ke tirelo ya nnete. Ga re rate go e leswefatsa ka maaka. Le teng re ipolela gore re bokoa, mme re kopa Modimo gore o re goge ka Mowa wa ona o o Boitshepo gore re kgone go fenya maleo a rona. Ke maikaelelo a rona, ke ona a go fenya boleo jo bo re bolayang, mme ga re ka ke ra kgona ka thata le nonofo ya rona. Ka moo re solofela, le go ikanya thata ya Mowa o o Boitshepo o o re gogang ka Lefoko la ona.

Modimo o re kgalemela ka Jeremia, motlhanka wa ona. Modimo wa tshegofatsa Baiseraele ka tse dintsi gore ba kgone go tshela sentle. Wa ba ntsha mo ntlong ya botlhanka, wa ba baakanyeditse manno a go aga sentle. Wa ba fa motse o mogolo, motse wa kwa Jerusalema, kgosi le moperesiti. Wa ba fa tempele e e boitshepo gore e nne felo ga MORENA mo gare ga batho ba ona. Tempele e ne e le ntlo e e boitshepo, mme Modimo wa kgalema, wa re: batho ba ona ba e fetotse go nna logaka lwa dinokwane. Le Jesu Keresete o ne a kgalemela Baiseraele thata ka gore "ntlo ya me ke ntlo ya thapelo, mme lona lo e dirile logaga lwa dinokwane. Batho ba fetola dilo tse dintle tse ba di

amogetseng mo Modimong gore e nne tse di maswe mo matlhong a ona. Mo Modimong ke selonyana fela gore a dige tempele. Modimo o tshwere lefatshe lotlhe mo seatleng sa ona. Ke selonyana fela go diga, le go senya logaga lwa dinokwane.

Modimo ga o rate boleo, ga o rate gore re tshameke ka jona. O sentse tempele ya ona kwa Jesualema ka ntlha ya maleo a morafe wa ona. Barategi mo Moreneng, ga o ka wa senya tempele e e neng ya agiwa ka matlapa fela, mme wa bolaya le Morwaaona ka ntlha ya maleo a batho gore re bone boitshwarelo mo go Jesu Keresete yo o neng a re swela ka ntlha ya maleo a rona. A re atameleng mo Tempeleng e ntšhwa eo e e leng Jesu Keresete, re tsene mo go yona ka tlabologo ya nnete. Modimo wa neela Morwa ona gore re nne le felo ga boitshwarelo. Jesu Keresete ke Mopholosi wa baleofi, ke Mopholosi wa rona. A re atameleng mo go ene ka tlabologo ya nnete, ka go tlabologa tota, re khubame fa pele ka MORENA, Motlhodi wa rona ka dipelo tse di ikwatlhaetseng, le go hutsafalela maleo a rona, re atamele mo go ene ka dipelo tse ditshweu, re kope boitshwarelo jo bo boitshepo mo Motlhoding wa legodimo le lefatshe, re bo amogele ka tumelo.

A re ithuteng sešwa kajeno ka Lefoko la Modimo le e leng tlhagiso, le le kgalemang gore re se tshameke ka bopelotlhomogi jwa Modimo, mme re tlabologe, re hutsafalele maleo a rona, re itumelele tshiamiso ya tsamao ya rona, re e tlamalatse ka Lefoko la Modimo mo thateng ya Mowa o o Boitshepo. A re se ka ra tlwaela go kopana le Mong-wa-bopelotlhomogi ka tsela e e sa siamang, mme re atamele mo go ene ka boikokobetso, re kope thuso mo go ene, re nne re tswe mo ditirelong-Modimo, re tshele jaaka bana ba gagwe, kajeno le ka malatsi otlhe a beke. Amen.

**9. Thapelo:** Rara wa rona, yo o mo legodimong o re abele Mowa wa gago o o Boitshepo gore re tsamaye jaaka bana ba gago ka malatsi otlhe a botshelo jwa rona. Re tlabologe ka letsatsi le letsatsi, re nne re tshele ka fa tlase ga bopelotlhomogi jwa gago ka go go leboga le go go tumisa. Re kopa jalo mo leineng la ga Jesu Keresete, Mopholosi wa rona. Amen. Thapelo ya Morena: Rara wa rona yo o kwa legodimong. ....

10. Sefela sa 164 - 146/149

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. WEber, ka ngwaga wa 2013

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.